

湖北府縣志輯

中國地方志集成

嘉靖羅田縣志
光緒羅田縣志

中國地方志集成

中國地方志集成

湖北府縣志輯 ②①

嘉靖羅田縣志

光緒羅田縣志

江蘇古籍出版社 ● 上海書店 ● 巴蜀書社

重刊嘉靖羅田縣志序

寶沅之長羅田也爲日至淺又當兵匪倂擾之世奚暇而爲表章文獻計今迺獲取明志祖本重予覆疊是何故哉其先蓋有啟予者在也憶癸亥初秋奉檄長縣在會城與都人士相見頗有期予爲脩纂方志之謀者予心知今日非修文之時雖在本縣之志具有資料並主此事亦有人然而默察舉世之人心風習往而不返凡屬舉辦名雖美而實則非徒供一時擾亂掠奪之資藉是以徘徊審顧憚於一發卽發亦必至不可收拾而止近十許年來所見皆如是也不然生平微尙所在顧獨何心臨流返駕漠然無所動於中也哉惟是垂老而結習未忘儻竟無鴻雪之留遺此心終無以自釋於時王青坨學部方以所得明代祝侯珣倡修之志相視並爲縷述得此書之艱與其在今日胸有放佚之危始欣欣然喜曰是可重印以餉縣人士而少彌余此行未及修復文獻之憾也蓋嘗取而繹之珍卿縣侯爲章文懿弟子已箸列萬季野儒林宗派文懿修蘭谿志以簡要名天下爰卽据爲體要並於去任時付之閩

學魁碩蔡教諭元偉俾董其成教諭亦張清恪道南源委中人也惟是時修志風尚相率以墨守功令惟景泰中頒行之寰宇通志爲歸卽本志凡例所稱大明一統志之原名也其間奮一家之言如康對山之志武功韓五泉之志朝邑更以仿漢書史記風動一世於是斯志及章志罔不在此範圍中此珍卿松莊修書淵源之可考者而彼兩君子者生承平明備之會以講學之儒又得共事一方相與修明廢墜剔幽隱以照後世在今日猶動人流連慨慕而況於身親其樂者乎此又當日遭逢之可羨者若其取材之過儉審度之未精要自無庸爲諱良由當時官師邑士藏書絕少舉所謂網羅羣乘經緯四部者均無暇措意特因時因地卽張玉泉師弟所零拾者整理之而明代講學之家復無清代史家考訂鑒別之雅尙故雖經歷久官紳之手而陳芝麓趙南濱者流率文士而非史才故其譌缺觸目孔多要其成書之矜慎內就驅括外薙蕪濫則迥非清代幾次縣書所及若取以訂補後來四次之志其益尤非淺渺且其書自天一閣收藏孤本外海內更無第二副鈔而羅田明代先達遺著

祇萬仙述方書與此編能逃於兵革劫火之外所謂中流失船一壺千金者非歟然則此邦之士夫及官斯土者可膜視委棄而不思鄭重表藏也乎寶沅老矣自審無可藉以結緣此邦學者特割廉二十萬錢浼青坨爲校印以永餉今後同志諸君青坨以癸卯第三人出余房平日談藝論心相視莫逆其近歲校書都門與文郎仲立發國家圖書館祕冊所得於茲方墜沈之文獻常以相示蔚成大觀今春又聞其舉仲立未成遺稿爲視志訂補十六卷余可斷其爲方志不朽盛業能發乾嘉諸老展齒未到之瓊觀惜乎逢時不祥挾可爲之具當不可爲之時僅得相與重嘯古人已燼之燄而仲立早世僅抱未抒此次又嗇於資不克取訂補同時付削僅得取仲立臨沒之夏手輯本志附錄一卷鐫之是又寶沅臨穎躊躇而未能已已者爾乙丑首夏從化李寶沅

羅田縣圖志序

羅田荆楚之陬區而黃州之隸邑也其衣桑麻其食穀粟肉蔬無魚鹽市舶通商之利故其俗勤生而力本無金玉貨貝綺縠繪錦珍禽怪獸名花異材之產故其俗質約而隘無車馬絡繹將迎供億之擾故其俗惜費而憚役無百工衆技紛華盛麗之飾故其俗專一習業而不遷瑯之始至也甚宜之以爲易治旣而迎

日輦見民數之寡弱遇大饑見杼軸之空竭隨逢巨寇見武備之疎虞輒歎曰亦凋弊創殘之地也可無惕乎乃於經理之暇不敢荒寧咨詢典故欲深究其殘弊之源而潛圖所以培養封植之策皆漫無所徵蓋爲之鬱悒而太息旣乃得一志稿於蔡生唯忠脫畧蠹裂條次混亂問之謂張玉泉諸名公相繼受周忠州勞崇德之託而筆削者也猶幸其綱要之所在未甚至磨滅得以緣舊而增新嗣是而莫之繼世遠人亡文獻不幾於泯乎爰禮羅外史楊君鶴洪君炯以董其事暨張生溶蔡生唯忠唯孝以專其勞搜羅覲縷摺撫融液越五旬宏綱細目草創略具頃

之楊君遷蔡君元偉繼至未幾羽亦濫膺行取之

命乃執簡授蔡君使踵志而纂成焉惜不及見其梓行而舟已先登矣然追思不佞之所以不其負於羅之民與民之所以獲安於殘弊之餘如危石衝流之不至於崩摧而潰決者則茲志之助與爲多焉嗚呼志之成於羅者若是其遲且難而其裨於政者又若是其明且易也後之人按圖觀風昭如指掌卽其類而求焉晝夜以思之思通而行之其於報政之速也何至如羽之樸鈍連蹇攸攸恤恤而僅得之者哉因僭識之以遺來者

嘉靖壬寅夏四月念五日

文林郎知羅田縣事蘭江前溪祝珣書

羅田縣志凡例

一羅田自有縣以來無志可徵考諸志於郡志於藩者失之略藏於故老者失之亂雖經訂於閩之陳芝麓粵之趙南濱維之張玉泉亦未就緒今乃得因諸公之筆而證之以藩郡之史搜羅舊聞徧訪新見分類以書其中有遺漏者俟博雅之君子補焉

一志中書法大略仿

大明一統志及史綱大書分註使觀之者易見其顛末

一公署先縣治以下而後府館以上者由卑以達尊也且以見主客之義焉不及學者已詳學校志也

一前輩行實不敢妄評但錄其所嘗見稱者附於科目之下其生存者只具載所歷之官蓋公論未定當以俟後之君子也貞烈無所於考只憑郡志若忠節孝義所載則論定而書無容議矣

一唐友義不仕而不列之隱逸者反義既舉於鄉則有天下之志矣而又不仕焉固非其本情也忠義之篤節概之高今之人猶能言之噫可尙哉

一王氏不嫁廢夫婦之倫也而附之貞烈者末世教衰淫風莫禁有如王氏雖賢者之過而亦人之所異也故附書之

一藝文有志他志皆大書於後今只分註於各類之下而藝文只標其端者所以便觀覽也其間工拙不同皆詳載者以有關風教或係名公筆跡故不敢遺然其所刪去亦多矣

一清軍非羅田講武之事而列之脩武者軍以衛民國家之武備孰大焉而且自羅田以充之不附之脩武將何居乎此有志於天下爲公之意也

一脩武志民兵畧而軍政詳者蓋民兵借力於農更代不一但以時練之足矣軍政則清勾之擾吏書之弊有不可勝言者故特詳焉

一災異有志而祥瑞僅附焉者春秋記災異不書祥瑞其意微矣况所載乃瑞之

末者可特志乎然則曷不去之傳習已久不以自我而廢也

一百神祠以下不附於廟祀而別之雜志者所以崇中正黜奇袤也東嶽非淫祠而亦別之何也非羅邑之所宜專也

一志之例大抵諱惡而彰善稽實而闕疑詳沒而畧存防諛而去誣

羅田縣志目錄

卷之一

地理志

星土 建置

附縣程

形勝

山川

城郭

坊鄉

市鎮

風俗

橋渡

塘堰

卷之二

食貨志

土田

物產

戶口

貢賦

附倉庫

役法

附工役

卷之三

官師志

職制

歷官

名宦

公署志

署舍 舖舍

卷之四

學校志

儒學 社學

人物志

科貢 薦辟 忠臣 節士 孝子 義士 貞烈 恩封 流寓

卷之五

惠政志

預備倉 養濟院 惠民樂局 義塚

官渡附

祀典志

廟祠 壇壝

卷之六

藝文志

詩賦記銘祭文

脩武志

民兵軍政關寨鄉堡

巡警冷鋪附

卷之七

災異志

水旱盜賊

祥瑞附


卷之八

雜志


古蹟 塚墓 寺觀 祠宇 亭閣 仙釋

按志之首地理何也非地則志莫之肇以作也緣地以起志故地理焉先財者土之所鍾而賦役胥原之以出也故食貨次之財萃而無統則爭故受之以官

師以統治而公署則官之所居也既治而不教則愚故受之以學校以施教而人物則教之所成也宣慈布惠治之本也崇正闢淫教之經也故次惠政次祀典文事武備不可偏也守成戢亂不可廢也故次藝文次修武次行人事之參會而咎徵應焉遇災者可不知懼乎災異所以居於志之終也遺事遺文之隱見而古述係焉類書之則非其要矣雜志所以列於志之末也此序次之大凡也



羅田縣公署圖



羅田縣志卷之一

地理志

唯王建國辨方正位體國經野有四方之史後世郡邑圖志基焉是故察星土而分界明矣詳建置而沿革昭矣辨疆域而遠邇定矣觀形勝觀山川觀城郭而險固設矣觀坊鄉觀市鎮觀風俗而民治彰矣觀橋渡觀塘堰而民利興矣凡吏茲土者所宜知也志地理

星土

分野之說其來舊矣自周禮春秋傳及歷代史志咸載焉郎官上應列宿出幸百里則察乾象觀妖祥以驗政治者固其職也其毋以天道遠而忽諸

禹貢荊州之域天文翼軫之次

周禮大司徒言十有二土不斥言所應者何次保章氏言星土辨九州之地不明言所辨者何星是分土分星不可以州國定名亦明矣主分野之是者則曰自張十七度至軫十七度爲鶉尾之次當楚之分遂以楚爲分星荊州之星土且驗以裨竈之知楚子及周楚惡歲害鳥帑之事班固志又曰荊楚翼軫之分則羅田在禹貢荊州